

BOSNA I HERCEGOVINA
FEDERACIJA BOSNE I HERCEGOVINE
Fond za zaštitu okoliša Federacije Bosne i Hercegovine
SARAJEVO

P R A V I L N I K
O USLOVIMA I NAČINU DODJELE ZAJMOVA, ILI POZAJMICA I DRUGIH
SREDSTAVA FONDA

Sarajevo, mart / ožujak 2010. godine

Na osnovu člana 27. stava 4. Zakona o Fondu za zaštitu okoliša Federacije Bosne i Hercegovine („Službene novine Federacije BiH“, broj: 33/03), i člana 44. stav 3. Statuta Fonda za zaštitu okoliša Federacije Bosne i Hercegovine („Službene novine Federacije BiH“, broj: 33/06), Upravni odbor Fonda za zaštitu okoliša Federacije Bosne i Hercegovine, na prijedlog direktora Fonda i uz saglasnost federalnog ministra turizma i okoliša, na sjednici održanoj dana 11. marta 2010. godine, donio je:

P R A V I L N I K
O USLOVIMA I NAČINU DODJELE ZAJMOVA, ILI POZAJMICA I DRUGIH
SREDSTAVA FONDA

I. OPŠTE ODREDBE

Član 1.

Ovim Pravilnikom propisuju se uslovi koje moraju ispunjavati korisnici sredstava Fonda za zaštitu okoliša Federacije Bosne i Hercegovine (u daljem tekstu: Fond), te način dodjeljivanja sredstava Fonda.

Član 2.

Korisnici sredstava Fonda mogu biti pravne i fizičke osobe koje ulažu sredstva u programe, projekte i slične aktivnosti u području očuvanja, održivog korištenja, zaštite i unapređivanja okoliša.

Pod pravnim osobama iz stava 1. ovog člana, podrazumijevaju se organi i tijela državne uprave, jedinice lokalne samouprave i subjekti koji su registrovani kod nadležnog suda, odnosno nadležnog organa uprave za obavljanje djelatnosti iz oblasti okoliša.

Pod fizičkim osobama iz stava 1. ovog člana, podrazumijevaju se fizičke osobe koje su registrovane kod nadležnog organa uprave za obavljanje djelatnosti iz oblasti okoliša.

Član 3.

Sredstva Fonda se mogu koristiti za namjene utvrđene u skladu sa članom 26.stav 1. Zakona o Fondu za zaštitu okoliša Federacije Bosne i Hercegovine (u daljem tekstu: Zakon o Fondu), koje se organizuju i provode na području Federacije Bosne i Hercegovine, kada ih organizuju i finansiraju međunarodne organizacije, finansijske institucije i tijela, te druge strane pravne osobe.

Član 4.

Sredstvima Fonda prvenstveno se finansiraju projekti, programi i slične aktivnosti u skladu sa strategijom zaštite okoliša, planovima zaštite okoliša, te drugim dokumentima i propisima u području zaštite okoliša.

Član 5.

Godišnjim i četverogodišnjim programom rada Fonda se utvrđuju područja zaštite okoliša u skladu sa članom 26. stav 1. Zakona o Fondu, u okviru kojih će Fond finansirati projekte, programe i slične aktivnosti.

Upravni odbor Fonda, u okviru utvrđenih područja, za svaku finansijsku godinu utvrđuje prioritete za dodjelu sredstava u skladu sa strategijom zaštite okoliša, te drugim dokumentima i propisima u području zaštite okoliša.

Na temelju prioriteta utvrđenih u skladu sa stavom 2. ovog člana, Fond raspisuje konkurse za dodjelu sredstava i određuje pojedine projekte, programe i slične aktivnosti za koje se raspisuje konkurs.

II. USLOVI KOJE MORAJU ISPUNJAVATI KORISNICI SREDSTAVA FONDA

Član 6.

Sredstva Fonda mogu ostvariti korisnici sredstava ako ispunjavaju sljedeće uslove:

- imaju sjedište na području Federacije Bosne i Hercegovine, odnosno Bosne i Hercegovine,
- ulažu vlastita sredstva u projekte, programe i slične aktivnosti u području zaštite okoliša,
- prihvate uslove zajedničkog sudjelovanja u sufinansiranju projekata, programa i sličnih aktivnosti za koje se odobravaju sredstva Fonda, propisane opštim aktima Fonda,
- podnesu zahtjev za korištenje sredstava Fonda, u skladu sa objavljenim konkursom,
- sklope ugovor sa Fondom o zajedničkom ulaganju u projekat, program i sličnu aktivnost za koje se odobravaju sredstva Fonda,
- zadovoljavaju i druge uslove utvrđene konkursom.

Član 7.

Pod vlastitim učešćem korisnika sredstava iz člana 6., stav 1., alineja 2. ovog Pravilnika, podrazumijevaju se:

- novčana sredstva korisnika,
- osnovna sredstva pribavljena radi realizacije ulaganja koje finansira Fond,
- kreditna sredstva drugih finansijskih institucija namijenjanja ulaganju,
- ulog drugih pravnih i fizičkih osoba vezan za ulaganje.

III. NAČIN DODJELE SREDSTAVA FONDA

Član 8.

Sredstva Fonda se dodjeljuju korisnicima sredstava radi finansiranja projekata, programa i sličnih aktivnosti, utvrđenih u skladu sa članom 3. 4. i 5. ovog Pravilnika, putem:

- zajmova,
- subvencija,
- finansijske pomoći,
- donacija, i
- pozajmice.

Član 9.

Sredstva Fonda se dodjeljuju pravnim i fizičkim licima, korisnicima sredstava, radi finansiranja namjena iz člana 26. stav 1. Zakona o Fondu, putem zajmova i pozajmica, subvencija, podrške, garancija i darovanja (donacija).

Član 10.

Fond može sredstva dodjeljivati na osnovu javnog konkursa ili na drugi način propisan Statutom Fonda.

Član 11.

Radi ulaganja u projekte, programe i slične aktivnosti u području zaštite okoliša, Fond privrednim društvima i drugim pravnim osobama te djelatnicima i fizičkim osobama, u pravilu, daje zajmove.

Kod davanja zajmova, Fond provodi postupak procjene izvodljivosti ulaganja, odnosno utvrđivanja finansijske, privredne, tehničke i kadrovske sposobnosti korisnika sredstava zajma, te očekivanih pozitivnih efekata sredstava koja se namjeravaju ulagati u projekte, programe i slične aktivnosti u području zaštite okoliša.

U postupku procjene izvodljivosti ulaganja u projekte, programe i slične aktivnosti u području zaštite okoliša, odnosno procjene finansijske i privredne sposobnosti korisnika sredstava, Fond sarađuje sa bankarskim sektorom u Bosni i Hercegovini.

Upravni odbor Fonda može donijeti odluku o saradnji, i sa drugim finansijskim institucijama radi provjere izvodljivosti ulaganja., odnosno procjene finansijske i privredne sposobnosti korisnika sredstava.

Radi osiguranja povrata zajmova, Fond u uslovima konkursa utvrđuje minimalne zahtjeve sa potrebnim instrumentima osiguranja sredstava, a konkretni instrumenti osiguranja plasmana sredstava Fonda se utvrđuju ugovorom o zajmu za svaki pojedini projekat, program i sličnu aktivnost u koju se ulažu sredstva Fonda.

Sredstva zajma Fonda se ne mogu odobriti dok korisnik sredstava ne osigura ugovorene instrumente osiguranja plaćanja.

Član 12.

Fond može subvencionirati ulaganja u zaštitu okoliša.

Subvencije se mogu davati na kamate, ulaganja i za zatvaranje finansijske konstrukcije ulaganja u projekte, programa i slične aktivnosti u području zaštite okoliša.

Korisnici subvencija mogu biti pravne i fizičke osobe koje ulažu sredstva u projekte, programe i slične aktivnosti u području zaštite okoliša, za koje finansijska institucija ili Fond utvrdi da su finansijski izdrživi.

Fond kod davanja subvencija, na odgovarajući način provodi postupak izvodljivosti ulaganja, odnosno utvrđivanja finansijske, privredne, tehničke i kadrovske sposobnosti korisnika sredstava Fonda, te očekivanih pozitivnih efekata sredstava koja se namjeravaju ulagati u okoliš.

Odlukom Upravnog odbora utvrđuje se način davanja i iznos subvencije.

Sredstva dodijeljena subvencijom su bespovratna.

Član 13.

Fond može subvencionirati kamatu komercijalnog kredita djelimično ili u cjelosti.

Fond može obavljati isplatu subvencije kamate jednokratno za ukupan iznos i za cijelo vrijeme trajanja kredita, i sukcesivno u skladu sa ugovorenim dospijećima kamata, iz ugovora o kreditu čija se kamata subvencionira.

Korisnici subvencionirane kamate mogu biti pravne i fizičke osobe koje ulažu sredstva u projekte, programe i slične aktivnosti u području zaštite okoliša, za koje finansijska institucija ili Fond utvrdi da su finansijski održivi uz subvencioniranje kamatne stope.

O načinu dodjele subvencije kamata iz stavova 1. i 2. ovog člana, odlučuje Upravni odbor Fonda.

Član 14.

Kod subvencioniranja kamata, Fond prihvata instrumente osiguranja kredita, kao i poslovna banka koja je odobrila kredit ako Upravni odbor drugačije ne odredi.

Minimalne zahtjeve za potrebnim instrumentima osiguranja kredita Fond propisuje konkursom, a konkretni instrumenti osiguranja plasmana sredstava Fonda se utvrđuju ugovorom o subvenciji za svaki pojedini projekat, program i sličnu aktivnost za koju Fond odobri subvenciju.

Član 15

Finansijske pomoći Fond daje bespovratno, u skladu sa namjenama utvrđenim programom rada ili konkursom.

Programom rada ili konkursom se utvrđuje maksimalni iznos pomoći po pojedinom projektu, programu ili sličnoj aktivnosti u koje Fond ulaže sredstva.

Član 16.

Fond daje sredstva donacija pod uslovima i na način utvrđen programom rada Fonda ili konkursa.

Fond sredstva donacija daje iz prihoda ostvarenih iz izvora propisanih Zakonom o Fondu, a može ih davati i iz inozemnih prihoda ako je posebnim ugovorom sa inozemnom finansijskom institucijom koja osigurava sredstva ugovoreno dodjeljivanje sredstava putem donacija.

Član 17.

Kod davanja zajmova, subvencija, finansijske pomoći i donacija, Fond ima aktivnu ulogu u procjeni izvodljivosti ulaganja i očekivanih pozitivnih efekata na okoliš.

Fond neće dati zajam, subvenciju, finansijsku pomoć i donaciju ako utvrdi da je sporna izvodljivost ulaganja sredstava koja se najmeravaju uložiti, te da se ne mogu očekivati pozitivni efekti na okoliš.

Član 18.

Fond neće pustiti odobreni zajam, subvenciju ili finansijsku pomoć u opticaj, odnosno doznačiti donaciju korisniku koji nema sve uslove koji mu omogućuju uredno i namjensko korištenje odobrenih sredstva.

Fond će odobrena sredstva stavljati na raspolaganje korisniku sredstava prema fazama ulaganja i ispostavljenim situacijama.

Fond može doznačiti korisniku sredstva i prema stvarnoj realizaciji ulaganja, ako je tako određeno ugovorom.

Član 19.

U slučaju da je neka obročna obaveza po zajmu dospjela a nije plaćena, Fond će upotrijebiti onaj instrument osiguranja od kojeg se očekuje najbrža naplata dospjele obveze.

Ako Fond ocijeni da su razlozi neispunjavanja obaveza opravdani, može ugovoriti drugačije uslove otplate zajma, te sklopiti dodatak u ugovoru.

Član 20.

Sredstva Fonda, bez obzira radi li se o direktnom ili indirektnom finansiranju, imaju namjenski karakter.

U ugovoru o dodjeli sredstava se mora navesti pravo kontrole namjenskog korištenja sredstava Fonda.

Za slučaj nenamjenskog korištenja sredstava, korisnik sredstava je dužan iznos nenamjenski utrošenih sredstava vratiti Fondu, zajedno sa pripadajućom zakonskom zateznom kamatom koja teče od dana prijema sredstava pa do dana povratka na račun Fonda i nadoknaditi nanесenu štetu Fondu u skladu s odredbama člana 27., stave 5. Zakona o Fondu, te odgovarajućim odredbama Zakona o obligacionim odnosima.

Član 21.

Sredstva fonda moraju biti korištena u skladu sa njihovom namjenom i rokovima korištenja, kako je to utvrđeno konkursom ili ugovorom.

U slučaju dodjeljivanja sredstava po obrocima, odnosno situacijama, korisnik sredstava je dužan dokumentirati namjensko korištenje za svaki obrok odnosno situaciju posebno, kao i za cijeli iznos korištenih sredstava Fonda.

Član 22.

Privredna društva i druge pravne osobe, djelatnici i fizičke osobe mogu ostvariti sredstva Fonda u visini koja se utvrđuje odlukom Upravnog odbora, odnosno konkursom za prikupljanje ponuda, a najviše do četrdeset posto zaokružene finansijske konstrukcije ulaganja.

Izuzetno, odlukom Upravnog odbora se može utvrditi učestvovanje sredstava Fonda u finansiranju projekata, programa i sličnih aktivnosti koje ostvaruju privredna društva i druge pravne osobe, djelatnici i fizičke osobe, odgovarajućom primjenom kriterija i u većem postotku.

Ako se radi o projektima, programima i sličnim aktivnostima u koja se ulažu sredstva Fonda na području Federacije BiH i Bosne i Hercegovine, koje organizuju i finansiraju međunarodne organizacije, finansijske institucije i tijela,

te druge pravne osobe, učestvovanje sredstava Fonda utvrđuje se ugovorom u visini koju svojom odlukom utvrdi Upravni odbor Fonda.

Član 23.

Korisnici sredstava Fonda su dužni sufinansirati programe, projekte i slične aktivnosti u području zaštite okoliša u okviru omjera iz člana 22. ovog Pravilnika, te pružiti dokaze o izvodljivosti i mogućnosti finansijskog praćenja ulaganja.

Dokazi u smislu stava 1. ovog člana, utvrđuju se konkursom.

Član 24.

Fond prati izvođenje projekata, programa i sličnih aktivnosti u skladu sa zaključenim ugovorom bez obzira da li su sredstva dodijeljena kao zajam, subvencija, finansijska pomoć ili donacija.

Ugovori o dodjeli sredstava Fonda moraju pored uobičajenih odredbi sadržavati odredbe o načinu kontrole izvođenja projekata, programa i sličnih aktivnosti, o načinu i učestalosti obavještanja Fonda, te o mjerama zbog neispunjavanja ugovorenih obaveza, a posebno o mjerama zbog nenamjenskog korištenja sredstava Fonda.

Član 25.

Fond ima pravo uvida u svu dokumentaciju vezanu uz procjenu izvedivosti ulaganja i očekivanih učinaka na okoliš, te sudjeluje u nadzoru izvođenja zahvata i namjenskog korištenja sredstava koja je dodijelio.

Član 26.

Fond prati i kontrolira namjensko korištenje sredstava na temelju izvještaja i pribavljene dokumentacije koju je dužan izraditi korisnik sredstava, i koja mora imati količinske i finansijske pokazatelje, potrebne za kvalitetno praćenje ulaganja sredstava Fonda.

Korisnik sredstava je dužan dostaviti Fondu izvještaje:

- u svako vrijeme na zahtjev Fonda i u rokovima utvrđenim ugovorom,
- završni izvještaj, najkasnije 15 dana po dovršetku ulaganja,
- godišnji izvještaj o postignutim učincima ulaganja na zaštitu okoliša, i to u razdoblju do pet godina po završetku ulaganja.

Fond se obavezuje da svakih šest mjeseci dostavlja Federalnom ministarstvu okoliša i turizma planove, programe i izvještaje o radu sa posebnim naglaskom na dodjelu zajmova ili pozajmica i drugih sredstava Fonda i namjenskom korištenju sredstava i ugovorenih prava i obaveza.

Član 27.

Korisnik sredstava je dužan bez odgađanja izvijestiti Fond o:

- svim mogućim odstupanjima od ugovorenih ulaganja,
- o svakoj situaciji koja sprječava ili odugovlači tok radova, odnosno ostvarivanje ulaganja te o mjerama za otklanjanje uzorka,
- statusnim i drugim bitnim organizacijskim i kadrovskim promjenama koje mogu uticati na tok ulaganja,
- promjeni zakonskog zastupnika,
- o drugim pitanjima utvrđenim ugovorom.

Član 28.

Fond može otkazati ili odložiti plaćanje ugovorenih sredstava korisniku sredstava, te zahtjevati vraćanje sredstava ako korisnik:

- dodijeljena sredstva dijelom ili u cjelini troši namjenski,
- nije dao Fondu kod dobivanja njegovih sredstava, odnosno pri sklapanju ugovora istinite ili tačne podatke,
- ne postiže očekivane učinke ulaganja, ili ne poštuje odredbe ugovora ili opštih akata Fonda ako se ugovor poziva na njegove odredbe,
- nepravilno koristi sredstva Fonda i odstupa od preuzetih ugovorenih obaveza,
- ne podmiruje ugovorene obaveze, odnosno ne prati ulaganja na način kako je to utvrđeno ugovorom,
- prestane sa redovnim poslovanjem ili postane finansijski nesposoban da prati daljnji tok ulaganja,
- svojim poslovanjem prouzrokuje uvođenje stečajnog, likvidacijskog odnosno drugog postupka koji onemogućava ostvarivanje ugovorenog ulaganja.

U slučaju manjeg odstupanja korisnika sredstava Fonda od ugovorenih obaveza na prijedlog direktora Upravni odbor može odlučiti da se ugovor preispita I dopunama ugovora omogući nastavak ulaganja ako se takvom dopunom osigurava ostvarivanje ciljeva projekta, programa ili druge ugovorene aktivnosti u području zaštite okoliša ili osigurava javni interes u zaštiti okoliša.

Član 29.

Pozivi za javno prikupljanje ponuda radi korištenja sredstava Fonda objavljeni prije stupanja na snagu ovog Pravilnika, dovršit će se uslovima propisanim u objavljenim pozivima.

Član 30.

Ovaj Pravilnik stupa na snagu danom objavljivanja u "Službenim novinama Federacije BiH".

PREDSJEDNIK
UPRAVNOG ODBORA
Mr. Pero M. Goluža, dipl.ing.

Broj: 12/05-2-2010.
Sarajevo, 11. mart/ožujak 2010. godine